

आकाशवाणी

खास-खास खबरां:-

- प्रधानमंत्री नरेन्द्र मोदी होर अज्ज ते कल नमीं दिल्ली च चला'रदे मुख सचिवें दे राश्ट्रीय सम्मेलन गी सम्बोधत करगंन।
- गृहमंत्री अमित शाह हो'रें आतंकवाद दे खलाफ कारवाइयें लेई राश्ट्रव्यापी सांझा स्कवाड तयार करने ते इसी तौले लागू करने दा निर्देश दिता ऐ।
- भारत नै बंगलादेश च अल्पसंख्यकें खलाफ होआ' रदी हिंसा ते जुल्म-ज्यादतियें दी जबरदस्त निंदेया कीती ऐ।
- सी.बी.आई नै उन्नाव दुष्कर्म मामले च कुलदीप सेंगर गी जमानत देने दे-दिल्ली हाई-कोर्ट दे हुकम गी सुप्रीम कोर्ट च चनोती दिती ऐ।
- महिला क्रिकेट च भारत नै 5 मैचे दी टी-20 श्रंखला च श्रीलंका गी 8 विकेटें कन्नै रहाइयै 3-0 दी बढ़त बनाई लैती ऐ।
- उत्तर-मध्य भारत दे ज्यादातर हिस्सें च अगले 3-4 दिनें च जबरदस्त ठंड ते धुंध पौने दे असार न।

<><><><><><>

PM Chief Secretaries

प्रधानमंत्री नरेन्द्र मोदी हो'र अज्ज ते कल नमीं दिल्ली च मुख सचिवें दे 5में राश्ट्रीय सम्मेलन दी अध्यक्षता करगंन। कल शुरु होए दे त्रै-रोजा इस सम्मेलन दा मकसद राश्ट्री विकास प्राथमिकताएं बारे ढांचागत ते लगातार गल्लबात राएं केन्द्र ते राज्य दी सांझ-भ्याली गी मजबूत करना ऐ।

इस सम्मेलन दा विशे सार ऐ “विकसित भारत लेई मानव पूंजी” जेहदे च राज्यें ते केन्द्र शासित प्रदेशें लेई अपनाई जाने आहली सर्वोत्तम प्रथाएं ते रणनीतियें गी शामल कीता गया ऐ। मुख्य सचिव- सब्बनैं राज्यें ते केन्द्र शासित प्रदेशें दे सीनियर अधिकारी ते खेतर दे माहिरें समेत होर दुए लोक इस सम्मेलन च हिस्सा लै”रदे न।

<><><><><><>

Shah –Counter Terrorism

गृहमंत्री अमित शाह हो”रें मुख्य भरै च आतंकवाद रोधी दस्ते ए.टी.एस दा इक एकीकृत ढांचा तयार करने दा आहवान कीता ऐ ते राज्यें दे पुलस महानिदेशकें गी निर्देश दिते न जे ओह इसी तौले शा तौले लागू करन। उ”नैं आखेया जे इके जनेही ए.टी.एस. प्रणाली सब्बनैं स्तरें पर आतंकवाद दे खतरे कन्नै निब्बड़ने लेई तयारियें गी बधाग। शाह हो”र नमीं दिल्ली च राष्ट्रीय जांच एजेंसी आस्सेया आयोजित दो-रोजा आतंकवाद रोधी सम्मेलन -2025 दा उदघाटन करने मगरा बोला”रदे हे। उ”नैं पहलगाम आतंकी हमले ते दिल्ली बम धमाके दे मामलें दी जांच गी पूरी चाल्ली चौकस पुलस बवस्था दी मिसाल दस्सदे होई सराहना कीती। गृहमंत्री हो”रें आखेया जे सुरक्षाबलें आपरेशन सिंदूर राएं आतंकी योजनाकारें गी कामयाबी कन्नै सजा दिती ते आपरेशन “महादवे” तैहत हमलावरें गी बेअसर करी दिता।

उ'नें समूलचे आतंकी नैटवर्क गी असरदार ढंगे कन्ने खत्म करने लेई जम्मू-कश्मीर पुलस ते होरनें एजेंसियें दी बी सराहना कीती।

<><><><><><>

MEA -Briefing

भारत नै बंगलादेश च अल्पसंख्यके खलाफ जारी हिंसा पर गैहरी चिंता प्रगट कीती ऐ। विदेश मंत्रालय दे प्रवक्ता रणधीर जयसवाल हो'रें कल नमीं दिल्ली च मीडिया गी दस्सेया जे भारत- बांगलादेश दे मयमनसिंह शैहर च हाल च इक हिंदू नौजवान दी जालमाना ढंगे नै मार कुटाई ते हत्या दी सख्त निंदेया करदा ऐ। उ'नें इब्बी आखेया जे बांगलादेश दी अंतरिम सरकार दे कारजकाल दौरान हत्या- अगगजनी ते जिमियां कब्जाने समेत अल्पसंख्यके खलाफ हिंसा दियां 2 जहार 9 सौ कोला मतियां घटनां दर्ज कीतियां गेइयां न। उ'नें आखेया जे इनें घटनाएं गी छड़ा मीडिया च बधाइ-चढ़ाइयै दस्सी गेदियां खबरां आखियै खारज नैई कीता जाई सकदा। जयसवाल हो'रें आखेया जे भारत- बांगलादेश च अजाद-निरपक्ख समावेशी ते सहभागी चुनाएं दा समर्थन करदा ऐ।

<><><><><><>

Turkey- ISIS

तुर्किये दे सुरक्षाबलें क्रिसमिस दे नमें बरे दे जश्ने दौरान आतंकी हमले दी साजश गी रोकने लेई शुरु कीते गेदे अभियान दौरान ISIS आतंकी संगठन दे 115 संदिग्धे गी हिरासतै च लेई लैता ऐ।

इस्ताबुल प्रशासन आसेया जारी इक ब्यान च आखेया गया ऐ जे जांचकर्ताएं एह पता लगाने पर संदिग्धें लेई गिरफ्तारी वरंट जारी कीते जे ISIS दे आतंकी बरे दे खीरें च छुट्टियें दौरान क्रिसमिस ते नमें बरे दे जश्न दौरान हमलें करने दी त्त्यारी करै करदे न। पुलसै देशै दे बक्ख-बक्ख हिस्सैं च 124 थाहरें छापेमारी दौरान बड़ी मती मात्रा च थहेयार-असलाह- गोलीबरुद ते होर केंई दस्तावेज बी बरामद कीते न।

<><><><><><>

CBI Unnao Case

केन्द्रीय जांच ब्यूरो सी.बी.आई नै उन्नाव दुष्कर्म मामले च उत्तर-प्रदेश दे साबका विधायक कुलदीप सिंह सेगर गी दिल्ली हाई कोर्ट आसेया उम्रकैद दी सजा गी खारज करियै जमानत मंजूर करने दे आदेश गी- चुनौती देने लेई सुप्रीम कोर्ट दा रुख कीता ऐ। सी.बी.आई नै कल हाई-कोर्ट दे फैसले दे खलाफ सुप्रीम कोर्ट च विशेष अनुमति सरबन्धी दरखास्त दाखल कीती ऐ। एहदे शा पैहले हाई-कोर्ट नै साबका विधायक दी उम्रकैद दी सजा दे खलाफ- उंदी अपील बकाया पेदी रौहने दे दौरान उसी खारज करने दा हुकम जारी कीता ते उनेंगी किश शर्तें कन्नै जमानत बी देई दिती ही। सेंगर उत्तर-प्रदेश दे उन्नाव दुष्कर्म मामले च 2019 च विशेष सी.बी.आई अदालत आसेया दोषी ठहरांदे होई- उम्र कैद दी सजा सुनाई ही ते कन्नै गै 25 लक्ख रपे दा जर्माना लाया हा।

उन्नै अपने-आपै गी दोषी ठहराए जाने दे खलाफ दिल्ली हाई-कोर्ट च जनवरी 2020 च दरखास्त दिती ही ते मगरा मार्च 2022 च अपनी सजा गी अगड़े पाने दी अपील दायर कीती ही। सी.बी.आई नै हाई-कोर्ट दे हुकम दी जांच करने दे बाद इस मामले च सुप्रीम कोर्ट गी दखल देने लेई बी आखेया हा।

<><><><><><>

Prez Visit

राष्ट्रपति द्रौपदी मुर्मू होर अज्जै थमां गोवा- कर्नाटक ते झारखंड दे चंऊ दिनें दे दौरे पर होगन। अज्ज शामीलै ओ पैहले गोवा जागन। कल कर्नाटक दे कारवार बंदरगार थमां पनडुब्बी च समुन्द्री यात्रा करगन ते संगारे ओ जमशेदपुर च ओल चिकी लिपि दे शताब्दी समारोह च शामिल होगन। इस लिपि दी शुरुआत 1925 च रघुनाथ मुर्मू होरें संथाली भाषा लेई कीती ही। एह लिपि संथाल आदिवासी समुदाय लेई सांस्कृतिक ते भाषाई नजरिए कन्नै बड़ी मती अहम ऐ ते उं'दी पंछान साहित्य ते विरासत दे संरक्षण च बड़ी महत्वै आहली भूमिका निभा'रदी ऐ। राष्ट्रपति होर उस्सै रोज NIT जमशेदपुर दे 15में दीक्षांत समारोह गी बी सम्बोधत करगन। मंगलवारे राष्ट्रपति होर झारखंड दे गुमला च अंतराष्ट्रीय जन-सांस्कृतिक समागम समारोह -कार्तिक यात्रा गी बी सम्बोधत करगन।

<><><><><><>

Women's Cricket

भारत नै कल रातीं तिरुवंनतपुरम च त्रीए महिला क्रिकेट टी-20 अंतराष्ट्रीय मकाबले च श्रीलंका गी 8 विकटें कन्नै रहाई दिता। इस जित दे कन्नै गै भारत नै 5 मैचें दी श्रंखला च 3-0 दी बढ़त बनाइयै श्रंखला अपने नां करना पक्का करी लैता ऐ। श्रीलंका नै 20 ओवरें च 7 विकटें दे नुकसान पर 112 रन्ज बनाए। श्रीलंका लेई इमेषा दुलानी नै सब्बनै शा मते 27 रन्ज दा योगदान दिता। भारत लेई रेणुका सिंह ठाकुर नै 4 जिसलै'के दिप्ती शर्मा नै 3 विकट हासल कीते। भारत नै छड़े 13 ओवरें ते 2 गेंदें च 115 रन्ज बनाइयै मैच जिती लैता। शेफाली वर्मा नै 42 गेंद पर 79 रन्ज बनाए ते खीरै तगर आउट नैई होई। रेणुका गी “प्लेयर ऑफ द मैच” घोषित कीता गया। एहदे शा पैहले भारत नै ऐतवारे पैहले मैच च श्रीलंका गी 8 विकटें कन्नै रहाया ते ओहदे बाद मंगलवार विशाखापत्तनम च दुआ मकाबला 7 विकटें कन्नै जितेया हा।

<><><><><><>

Weather

मौसम विभाग नै उत्तर-प्रदेश च अगले 3-4 दिनें दौरान घनी धुंध पौने दा रेड-अलर्ट जारी कीता ऐ। मैहकमे दा आखना ऐ जे नेह हालात बिहार-हरियाणा-चंडीगढ़- दिल्ली- हिमाचल-प्रदेश ते पंजाब च बने रौहने दे आसार न। एहदे इलावा उत्तर-पच्छमी भारत दे किश हिस्सें- ओडीशा- उप-हिमालयाई पच्छिम बंगाल- सिक्कम ते उत्तराखंड च बी अगले त्रै कोला चार दिनें तगर धुंध दा परकोप बने दा रौहग।

झारखंड उत्तर-प्रदेश- बिहार ते उत्तराखंड च अज्ज ते कल जबरदस्त सीत लैहर
दी शेंका जताई ऐ ते लोकें गी जरूरी एहतियात बरतने लेई आखेया गया ऐ।

<><><><><><>